

聚學軒叢書



安徽金石略卷七

涇縣趙紹祖輯

貴池劉世珩校刊

鳳陽府

壽陽紫金山父已彝

廬江李氏所藏父已彝得於壽陽紫金山其蓋得於
淮之硤石下縮六寸衡八寸高尺有一寸深六寸五
分容一升五合銘二行五字一行爲父已一行爲析
子孫案古篆多象形商有子孫彝孫字作兩手拱目
之狀此彝孫字與商子孫彝同定非三代下物

博古圖

淮南故宮戈

新平張氏得戈於壽陽紫金山漢淮南王之故宮以

古弩機之度度之刃廣寸半內長四寸胡長六寸援

七寸半胡有銘各六字蟲鳥書黃金文

博古圖

已舉爵

李公麟得古爵於壽陽紫金山腹有二字曰已舉高
七寸縮六寸衡二寸有半足高三寸容四合

小知錄

漢趙王武臣碑

趙王武臣碑在宿州

金石略

案宿州志陳勝冢在州西北邱疇山之西麓名曰
冢頭而不言有碑然當時或有碑不可知若武臣
之冢與碑則不應在宿州疑金石略誤以陳勝爲

武臣也

趙紹祖識

漢相山祠三百有五碑

無年月

在宿州

佚

相山距城九十里在相城鄉其脈自彭城蜿蜒而來
高五里周二十里稱州中巨鎮上有古祠漢碑三百
有五率殘斷不可讀

宿州志

漢戚伯著碑

無年月

在宿州

佚

文載隸釋

右伯著碑在今宿州出於近歲蓋宮部春夫開汴渠
於泥沙中掘得之其文字古怪而磨滅不可讀其僅
可見者渤海君元孫季景長子也其事迹不可考文
辭莫曉而字畫不工徒以其古怪錄之此誠好古之
弊也治平元年七月三十日

集古錄

右其字畫如隸書而甚古怪伯著者莫知爲何人其

時世亦不可考但其額曰周末嗣某氏

某字不

襲興

興上闕一字

渤海君元孫伯著之碑而已然則周亦非伯

著之姓也

集古錄目

右戚伯著碑其略可見者充列王室遇謗於呂委位捐爵而其額題周末嗣戚氏襲以興渤海君元孫伯著之碑知其姓氏戚所謂充列王室遇謗於呂者戚夫人也

金石錄

右本周末嗣戚氏襲以興渤海君元孫伯著之碑隸額本之上有一字石損其半嘉祐中宿州浚汴得之泥沙中碑敘其先云調官沛上安措東山子孫孝弟蓋戚姬遭呂后之禍其族有官於沛者宅兆所卜子

孫因家焉符離卽沛之封內也襲以興者謂襲周之
後而興此時墓刻始萌芽標題未當律令其字畫古
怪偏傍增減亦有不可辨者世祖建武三年章帝章
和元年威宗建和元年獻帝建安十二年皆丁亥也
碑有大歲丁亥字當是建武或章和所刻者碑云而
以性爲姓也京昆府丞以昆爲兆也父卽之字是卽
是字策卽中字泉卽京字昆卽丞字事卽事字寸卽
才字美卽筆字龜卽龜字如卽始字躬卽邪字而卽
不字匱卽實字惟芳字未詳隸釋

漢立孫叔敖廟碑

無年月

在壽州

佚

東漢孫叔敖廟碑在安豐縣東三里孫叔敖廟中興地
紀勝碑目

晉建相山廟碑銘

太康五年

在宿州

佚

晉太康五年詔諸侯祀界內山川沛國令郭卿建廟
銘曰巍巍相山盤紆穹崇上應房心與天靈沖興雲
降雨稼穡以豐

宿州志

晉元康城磚

元康三年

在壽州

存

鄱陽陳秋麓司馬

名其松

得晉壽春磚以爲硯而使余

銘之余案其文曰元康三年七月廿九日秦秦蓋工
人之姓而闕其名也壽春古用武地當元康三年晉
亂潛兆而尙未形自此至永嘉四年僅十七年中原
多故周馥鎮壽春請遷都晉疑其不臣而討之而壽
春之兵禍始此矣未幾晉南遷而此爲南北必爭之
地兵戈相尋凡二百餘年至於隋平陳而後已乃不

謂此塶之尙得存於今也銘曰塶乎硯乎汝厭鋒鏑
苦樂圖書之府經千三百載而出於土乃逢汝主道
光四年 趙紹祖識

宋武帝受禪壇記

永初元年

在壽州

佚

宋武受命壇記陸德八分書在壽州

墨池編

案宋武以元熙元年七月遷壽陽二年四月徵入
輔六月至京師卽以是月丁卯設壇於南郊受禪
則壇自在建康不得在壽陽或壽陽人豔其事以
其記重刻之於其地也金石略墨池編皆言在壽
州而所載甚略不得而詳矣宋永初元年卽晉元
熙二年也 趙紹祖識

宋受命壇記碑陰

在壽州

佚

在宋武受命壇

輿地紀勝碑目

齊八公山廟碑

永明十年

在壽州

佚

在壽春縣北四十里八公山廟前有碑乃齊永明十

年立

輿地紀勝碑目

天下名勝志引寰宇記云八公山有淮南王廟圖安
及八士像有齊永明所建碑云安與八公埋金其下
一名金梭堆在州東十里雨後輒見金今寰宇記無
此語 壽州志

案碑目云在縣北四十里壽州志云在州東十里
豈建州時移其地耶何相懸如此也 趙紹祖識

梁八公山廟碑

無年月

裴邃撰

在壽州

佚

案梁書壽陽八公山廟碑刺史蕭遙昌立主簿裴邃
爲文今佚

壽州志

隋劉家闕殘碑

無年月

在宿州

佚

劉家闕在宿州東二十五里隋隄北煬帝築隄時正
經劉氏先塋劉時有貴顯者屬當事自其塋西隄南
曲里許至塋東復曲而北其形如弓約八九里因名
劉家闕其北里餘爲劉氏漢晉故里里南里東皆其
先塋元明時猶有墓碑今漫滅無復存者

宿州志

唐褚遂良殘碑

無年月

在宿州

未見

在州西南丹城舊縣古廟中碑石作六稜面而有字

明初居人以水沃之有貞觀年號與褚遂良字可識

筆法宛然如所臨樂毅論

宿州志

唐符離縣睢水石橋碑

無年月佚

房晉撰

在宿州

右碑在宿州

金石略

碑文房晉撰

宿州志

唐紫極宮碑

無年月

王維書

在壽州

佚

右碑王維書

天下金石志

唐壽州紫極宮記案考槃餘事王維書今佚

壽州志

唐立楚王祭淮壇碑

永泰元年

右壽州

佚

在壽春縣北四十里唐永泰元年立

輿地紀勝碑目

廢西壽春縣在州西南四十里一名楚考烈王故城

城中有楚王祭淮壇碑

壽州志

唐立梅先生碑

陳章甫撰
志作羅隱撰

在壽州

佚

文載壽州

碑云漢成帝時綱紐頽壞先生以書諫天子者再三夫大政雖去而劒履間健者猶數百位尙不能爲國家出力以斷佞臣頭何南昌故吏憤憤於其下得非南昌遠地尉下寮苟觸天子網突倖臣牙止於殛一狂人噬一單族而已彼公卿大臣有生殺喜怒之任有朋黨蕃衍之大出一言作一事必與妻子謀苟不便其家雖妾婢亦撓挽相制而況親戚乎況骨肉乎雖有憂社稷心亦噤而不吐也嗚呼寵祿所以勸功而位大者不語朝廷事是知天下有道則正人在上

無道則正人在下余讀先生書未嘗不爲漢公卿恨
今南游復過先生里遂碑之

案壽州志以爲羅隱作云見昭諫集有告余者曰
此刻新修全唐文中乃唐開元間進士陳章甫所
撰余旣皆未之見姑兩存其說以俟後之攷定者
又天下金石志載此碑於潁州亦云羅隱書而不
言其撰文皆未知孰是 趙紹祖識

唐壽州刺史張鑑頌

大歷十四年

趙亘撰

在壽州

唐壽州刺史張鑑去思碑王湍分書大歷中

金石略

右碑趙亘撰王湍八分書大歷十四年十二月

金石錄目

按唐書張鑑曾爲壽州刺史墨池編作張鑑字之

誤也輿地紀勝碑目作張公度去思頌鑑字公度
不誤惟碑目作大厯十年起居舍人趙運文撰與
金石錄目不同或趙亘字運文亦未可知趙紹祖識

唐智源禪師塔銘

元和九年

在鳳陽縣

佚

元和九年立在鍾離縣西南九十里今爲廣慧寺輿地紀勝碑目

唐彭晁禹廟記

元和十四年佚

彭晁撰

在鳳陽府

記大略云昔禹治水之日會於塗山則此地是也今
禹會鄉因茲而立今有禹家夏家皆是禹之苗裔元
和十四年彭晁記輿地紀勝碑目

唐杜亭碑

元和中

杜牧撰

在鳳陽府

佚

在鍾離縣西七十里遺碑拭視元和中大常寺協律

郎杜牧作今碑尙存

輿地紀勝碑目

唐州碑古篆

無年月

在鳳陽府

佚

世傳以爲李陽冰書按唐地理志州舊名豪元和三年始益之以水作濠是時陽冰歿久矣或云元豐中郡人錢叔獻見一石刻云豪州碑文開元寺碑皆韓熙載書

輿地紀勝碑目

唐四望亭記

大和七年

李紳撰

在鳳陽府

佚

唐四望亭記李紳文并書在濠州

金石略

四望亭記李紳撰正書大和七年二月

金石錄目

唐壽州刺史廳壁記

無年月

李華撰

在壽州

佚

文載壽州志

記略云漢文帝封淮南王長子安爲王都壽春卽此
州也兩漢揚州刺史治於此壇壇猶在在後魏盧潛
爲揚州亦鎮於茲潛有德政時人比之羊祜我朝壽
春郡隸揚州某年以兼侍御史揚州司馬獨孤問俗
爲壽州刺史有德政理州三年遷御史中丞鎮江夏
工部郎中楚州張緯之代爲州牧某部郎中常延安
代張典此州僉有政聞故書其事以慰楚人之心

唐紫極宮記

會昌四年

在壽州

未見

王惟貞書會昌四年在壽州

金石略

唐紫極宮鐘銘

無年月

在壽州

未見

唐紫極宮鐘銘沙門維紀書

天下金石志

唐濠州勸民栽桑敕碑

大中十年

在鳳陽府

佚

余得劉莒修兗州文宣王廟碑見大中時中書門下牒又得此碑見大中時敕乃知平章事非署敕之官今世止見中書門下牒便呼爲敕惟告身之制僅存焉

集古錄

唐勸農敕

大中十一年

在鳳陽府

佚

集古錄云不著書人名氏唐宣宗時濠州刺史侯固奏言其州以桑爲稅民患伐去之固勸使栽植請除其稅敕依所請并李官請立石狀同以大中十一年立石今存

輿地紀勝碑目

唐勸栽桑碑

大中十四年

在定遠縣

佚